

Date – 24/11/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Assam Dholai-ah vawiin khan Assam & Mizoram Border Festival 2025 hman a ni.
2. Delhi-a cham mek Chief Minister Pu Lalduhoma leh Union Railway Minister Pu Ashwini Vaishnaw ten Sairang atanga ramchhung hmun danga tlan rel service dan remchang zawk dap an remti.
3. Justice Surya Kant chu vawiin khan Chief Justice of India 53-na turin lakluh a ni
4. Lemchanchiam hranghlui leh Padma Bhushan dawng tawh Dharmendra chu vawiin khan Mumbai-a a chenna inah kum 89 mi niin a thi.

<><><>

MIZORAM-ASSAM BORDER FESTIVAL

Assam Dholai-ah vawiin khan Assam & Mizoram Border Festival 2025 hman a ni a, he hunah hian Mizoram atangin Kolasib District leh Mamit District te an tel a, Kolasib DC Pu Robert Lalhmangaiha'n a ho a, Assam lam atangin Cachar MP Parimal Sukhlabaidya, Dholai MLA Nitar Ranjan Das te telin, Cachar DC Mridul Yadav in a tawiawm bawk a ni.

Festival hmannaah hian Kolasib DC Pu Robert Lalhmangaiha chuan thusawiin, Mizoram leh Assam ten inlaichinna tha zawk an neih zel a tul a, state pahnih inkarah buaina a awm tur a ni lova, kum hnih thum liam ta a ramri a buaina ang kha a thlen tawh lohna turin theihtawp a hma lak tlan a ngai a ti. Nakum maia Assam in inthlanpui a hmachhawn dawn avangin ramri ah buaina siam zawnga hmala lo turin a chah bawk.

Cachar MP Parimal Sukhlabaidya chuan thusawiin, State pahnih inkarah harsatna awm thin mahse a pawimawh ber chu ram khat an nihna chu a ni a ti a, India dah pawimawh hmasa ber a tul a, India ram mi vek kan ni a ti. Kolasib leh Dholai inthianthathna chu tun hnu a mi a ni lova, tun hma atanga awm tawh a ni a, Cachar ah pawh Mizo hnahthlak tam tak an awm a, chutiang bawkin Kolasib, Mizoram ah pawh hnamdang tam tak an awm ve bawk a, sumdawna kawngah pawh an inluh pawh a, an insumdawn tawn bawk a, hna pawh an inthawh pawlh

nasa hle a, ramri chungchang ah buaina a awm tur a ni lova, ramri pawh a awm tur a ni lova, ram khat kan ni a ti.

He hunah hian Dholai MLA te, Mamit atangin Kawrthah SDO(C) ten thu an sawi ve bawh a ni.

Kan corr report lo ngaithla ang.

Mizoram- Assam Border Festival ah hian Cultural item chi hrang hrang buatsaih a ni a, Mizoram atangin Cultural Troupe pali an kal a, Football leh Volleyball kheltur infiammi engemawzah an kal bawh. Hetiang tho hian Cachar lam atang pawhin Hnam lam chi hrag hrang Khai, Manipuri, Naga, Cachari, Assemese ten an entir a, Football leh Volleyball hmangin Cachar leh Kolasib District ten infiamna hun an hmang bawh.

<><><>

LABOUR LAWS

Sorkar laipuiin a nitin inhlawhfa chawpa eizawngte tana dan a duan, Four Labour Laws chu Mizoram ah pawh hman vat a nih theih nan Mizoram sorkar a Labour, Employment Skill Development & Entrepreneurship Development hotuten hma an lak mek thu an sawi.

Kan corr report lo ngaithla ang.

Labour, Employment Skill Development & Entrepreneurship Development hotute chuan Four Labour Laws chungchanga sorkar laipui dan duan guidelines chu tunhnaia hriattir an nih chauh thu leh, hemi atan hian inbuatsaihna an theih ang tawh a an lo neih lawk tawh thu an sawi a, Mizoram sorkar lo ruahman lawk dan leh sorkar laipui guide lines chu in hne rem tura chinfel vat a nih tur tu leh hemi atan hian a hma thei ang berah thutkhawm an neih vat tur thu an sawi bawh.

Sorkar laipuiin a nitin inhlawhfa chawp a eizawngte tana dan a duan, Four Labour laws-ah hian hun hmasa lama dan lo zam tawh, Code on Wages 2019, Industrial Relations Code 2020, Code on Social Security 2020 leh Occupational Safety, Health and Working Conditions Code 2020-te chhun fin a ni.

<><><>

CM-RAILWAY

Delhi-a cham mek Chief Minister Pu Lalduhoma leh Union Railway Minister Pu Ashwini Vaishnaw te chu New Delhi-a Railway Bhawan-ah an kawm a,

Thenzawl Peace City Master Plan siam mek a nih avangin Sairang leh Thenzawl Railway alignment chu peihfel vat a tul thu Chief Minister hian a sawio a, Railway Minister hian nakum February thla ral hma ngeia peihfel an lo tum tur thu a sawi a ni.

Sairang atanga Guwahati thleng rel kal mek chu passenger-te awlsam zawkna turin Guwahati hi zing dar 4:30 a thleng thla hman tura a kal hun siamrem Chief Minister hian a rawt a. Sairang atanga Delhi Rajdhani Express tuna tlan mek hian Delhi thleng thla turin darkar 42 leh minute 20 a mamawh a, hemi chungchangah hian Chief Minister chuan, kawng tawi zawk zawh tir turin rawtna a thlen bawh a.

Hengte hi Railway Minister chuan lo pawmsakin, kawng tawi leh rang zawk zawhtir a nih tur thu a lo hrilh a, he kawng tharah hi chuan darkar 4 velin rel hi a thleng hma tawh dawn a ni.

Chief Minister hian Sairang to Delhi Rajdhani Express chu khualzin an tam avangin kar khata vawi hnih tal tlantir turin rawtna a thlen bawk a, Kolkata leh Sairang inkar rel, Sairang Station-a zan dar 7:45 PM a thleng thin chu khualzinte tana awlsam zawk turin tlai dar 3:00 PM a thleng tura siamrem rawtna Chief Minister hian a thlen bawk a. bawhzui a nih tur thu in Union Minister chuan a lo chhang a ni.

Chief Minister hi Dr KC Lalmalsawmzauva, Adviser to Chief Minister (Handholding Policy) leh Pi R Lalrodingi, OSD to Chief Minister ten a tawiawm a ni.

Chief Minister Pu Lalduhoma hian DONER Minister Pu Jyotiraditya Scindia a kawm bawk a, Chief Minister chuan DoNER hnuaiia Empowered Inter-Ministerial Committee thukhawmin ni 19 August, 2025 a a lo pawm tawh Pukzing - Silsury kawng leh Champhai - Tualpui kawng siamna tur bakah Mizoram chhunga Oil Palm Link Road siamna tur sum chu sanction thuai turin a ngen a. DoNER Minister chuan sum awmdan a zirin tun Financial Year-ah emaw Financial Year tharah pawisa hi sanction ngei an tum thu a lo hrilh a ni.

<><><>

UNION MOS- AGRI VISIT SIAHA

Union Minister of State for Agriculture and Farmers' Welfare, PuRam Nath Thakur chuan 'Poorvottar Sampark Setu Programme ' hnuaiia hnathawh hrang hrangte enfiahin vawiin khan Siaha a tlawh a.

Pu Ram Nath Thakur chuan MADC Complex panin hetah hian Agriculture Department - ten Exhibition an buatsaih a tlawh nghal a. Hemi hnu hian ama puala thutkhawm buatsaihah thu a sawi a. Pu Thakur-a chuan Prime Minister thupek anga lo kal a nih thu sawiin, Siaha mipuiten harsatna an neih leh mamawhte chu Prime Minister hnena a thlen tur thu a tarlang a. Loneimite hmasawwna chu sawrkar laipui ngaihpaawimawh ber a nih angin, chak taka hmalak mek zel a ni, a ti.

Union Minister of State - chuan Loneitute chu sawrkar laipuiin tanpuina a pek thin leh Scheme - hrang hrang a kalpuite tihlawhtlingtu nih tum turin a fuih a. Hmalam hunah pawh tanpuian pek zel a nih tur thu tarlangin, mamawh an neite ziak thlen turin a chah a, Prime Minister leh Union Minister for Agriculture and Farmers' Welfare hnenah amah ngeiin a pek tur thu a sawi.

MADC CEM Pu M. Laikaw chuan sawrkar laipuiin Autonomous District Council - te tanpuina a pek thin chu tangkai taka hman thin a nih thu sawiin, khawsak harsa zawk ten an chhawr tangkai hle a ni, a ti a. Siaha mipuite tana tanpuina awm thei ang angah pawh thahnem ngai taka ngaihpuir turin Union Minister - chu ngen a. CEM chuan MADC- dinhmun leh hnathawh dan tlangpui a tarlang nghal bawk.

Thutkhawmah hian Agriculture Department ten Sawrkarlaipui hnuaiia Scheme hrang hrang an kalpuite leh an thlen chin tarlan a ni a,. Mamawh an neihte pawh Union Minister - hnenah hian an thlen nghal a ni.

Pu Ram Nath Thakur hian Siaha District Hospital leh KVK hmun te a tlawh bawk a ni.

<><><>

ZPM PR

Vawiin khan ZPM Party pawhin an pisa ah chhung inkhawm neiin he hun a thusawitu Pu C. Lalnunema, ZPM General Hqrs Vice President chuan tunlaiin Opposition Party ten thudiklo hmanga ZPM party nasa taka an chirh theh thu leh Social Media lamah an party worker-ten theih tawp tak meuh an chhuah thute a sawi.

ZPM Vice President chuan, an MLA Pu Lalmuanpuia Punte Adviser to CM leh mi pakhat inbiakna chungchang zeldin thubawl hmang a ZPM party-in Assam Rifle Biak In hmun Party Office atan neih an tum tih chu an party an chirh thehna mai mai a nih thu leh eptu lam party te chuan dawt hri an la vei reng a ti a, Assam Rifle ram chhuahsan tur chungchang ngaihtuah tur hian a huap zo thei ang bera tlawmngai pawl telna Advisory committee-an din thu a sawi a, ZPM party chuan anmahni pual pisa an neih ve theihna turin bank loan lak pawh an inhuam thu leh hemi atan hian committee pawh an din tawh thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MNF

MNF Vice President Pu Lalchhandama Ralte MLA chuan Mizoram State University hmunhma Aizawl a ruahmantu chu ZPM ministry a ni a ti.

He thu hi vawiina Aizawl a Mizo Hnam Run inkhawm-ah Opposition Leader Pu Lalchhandama Ralte chuan sawiin, kumin November 20 khan Mizoram Assembly tihbawrhanna a thleng a ni, a ti a. Mizoram State University dinna tur chungchangah Chief Minister-in Lunglei chanchinbu mite hmaah thudiklo a sawi thu leh “NEP 2020 chu India ram zirna hmasawanna tur, state zawng zawngte zawm tur a ni a, hemi avang hian Mizorama zirna inte thiamna leh certificate petu tur State University din a lo tul ta a. MNF sorkar khan State University atan Cabinet chuan July 31, 2023 khan kan rel a. Aug 16, 2023-ah Bill Drafting Committee din a ni,” a ti.

Pu Lalchhandama Ralte chuan a thusawi zel naah ZPM sorkar thar chuan drafting committee-te chu hma a laktir thu leh kumin March 4 -ah bill chu pass a nih tak thu sawiin, sorkar hmasa MNF ministry draft stage-a an awm bakah an

hunlaiin a hmun tur engmah tihchian a la nih loh thu a sawi a, Leader of Opposition chuan Chief Minsiter in Cluster institution MNF sorkar thlan ti a sawitu a nih laiin Cluster college/institute order erawh kumin October ni 10 a tihchhuah chauh a ni a, Chief Minister chuan chawpchilh taka thudiklo a sawi hnem lutuk thu a sawi a, kar kalta Nov 20-a Lungleia University dah a nih tur thu Chief Minister Pu Lalduhoma'n a puan laiin Aizawla university hmunhma tura ruatah an la hnatlang luh luh a ni a ti.

Pu Lalchhandama Ralte chuan Aziawla State University dah "MNF tih vek, titu Mizoram Chief Minister chuan Chhim lam tan MNF-in engmah ti duh lo angin a sawi a hetihlai hian ZPM Ministry-a Higher and Technical Education Minister chuan Lungleia state university a dah chu inkalpawh zung zungna a buaithlak avang leh college panga neih a ngaih lai a Lungleiah pahnih chauh a la awm avanga a theih loh tih a sawi zawk thu a sawi bawk.

(MNF PR)
CJI

Justice Surya Kant chu vawiin khan Chief Justice of India 53-na turin lakluh a ni. President Droupadi Murmu chuan Rashtrapati Bhavan-a lakluh inkhawm buatsaihah rinawman thutiamtirin Chief Justice of India thar hi a lalut a. Chief Justice Surya Kant hian Chief Justice of India nilai Justice B R Gavai a thlak a. Justice Surya Kant October ni 30 khan CJI atan ruat a ni a. Kum 2027, February ni 9 thleng he hna hi a chelh dawn a ni.

Vawiina CJI lakluh inkhawmah hian Vice President C.P Radhakrishnan, Prime Minister Narendra Modi, Lok Sabha Speaker Om Birla leh Union Minister Amit Shah, Rajnath Singh, JP Nadda leh mi pawimawh tak takte an tel a ni.

<><><>

DHARMENDRA

Lemchanchiam hranghlui leh Padma Bhushan dawng tawh Dharmendra chu vawiin khan Mumbai-a a chenna inah a thi. Kum 89-a upa Dharmendra hi hun rei tak damlohna avanga enkawl a ni a, tun thla tir khan Breach Candy Hospital ah dahluh a ni. Dharmendra hian kum 60 chhung film khawvela hun a hman chhungin film 300 chuangah a inlan a. A film chan langsar zual zingah Sholay, Phool Aur Patthar, Seeta Aur Geeta, Chupke Chupke, Dharam Veer leh Pratigya te an tel.

Dharmendra hian a nupui Hema Malini leh a nupui hmasa Prakash Kaur bakah a fate paruk Sunny Deol, Bobby Deol, Ajeeta, Vijeta, Esha Deol leh Ahana Deol te a thihsan a ni.

President Draupadi Murmu, Vice President C.P Radhakrishnan leh Prime Minister Narendra Modia te chuan Dharmendra thi chu an ui thu social media lamah an tarlang a. President Murmu-i chuan Indian cinema tana channa nasa tak anih thu a sawi a ni.

<><><>